



## Njia Mpya ya Kuishi kwa Ajili

### ya Wote

**B**asi Yesu alipokwisha kuipokea ile siki, alisema, Imekwisha. Akainama kichwa, akaisalimu roho yake.—Yohana 19:30.

Dunia, kamwe ilikuwa haijawahi kushuhudia tukio la namna ile. Wengi walisimama wakiwa wamepooza na huku wakishika pumzi walimtazama Mwokozi. Kwa mara nyingine giza lilitawala dunia, na kisha ngurumo kali kama vile radi kali, vikasikika. Kulikuwa na tetemeko la kutisha. Watu walitikiwa pamoja katika makundi. Kukawa na kuchanganyikiwa kubaya na fadhaa. Kwenye milima iliyozunguka pale, miamba ilipasuliwa, na ikawa ikiporomokea kwenye eneo tambarare. Makaburi yaliyochongwa miambani yakapasuka, na wafu wakatupwa kutoka kwenye makaburi hayo. Viumbe vilionekana kutetemeka hadi katika atomu zake. Makuhani, watawala, wanajeshi, wauaji na watu, wakinyamaza kwa hofu, walilala kifudufudi ardhini.

Wakati kilio kikuu, “Imekwisha,” kilipotoka kwenye midomo ya Kristo, makuhani walikuwa wakiendesha huduma Hekaluni. Ilikuwa ni saa ya kafara ya jioni. Mwana – kondoo aliyekuwa akimwakilisha Kristo alikuwa ameletwa kwa ajili ya kuchinjwa. Akiwa amevikwa mavazi yake mazuri, ya maana, kuhani alisimama akiwa ameinua kisu, kama vile Ibrahimu alivyofanya pale alipokuwa amekaribia kumchinja mwana wake. Watu walikuwa wakitazama kwa shauku kubwa. Lakini mara ile nchi ikatetemeka na kutikisika; kwani Bwana Mwenyewe alikuwa amekaribia. Kwa kelele ya kupasuka, pazia la Hekalu likachanika kutokea juu hadi chini kwa mkono usioonekana, likiacha wazi machoni pa umati mkubwa, mahali ambapo paliwahi kujawa na kuwepo kwa Mungu. Ni mahali hapa ambapo Shekina ilikaa. Ni hapa ambapo Mungu alikuwa amedhihirisha utukufu Wake juu ya kiti cha rehema. Hakuna mwingine isipokuwa kuhani mkuu, ndiye aliyewahi kuinua pazia lililotenganisha sehemu hii na sehemu nyingine ya Hekalu. Lakini ajabu iliyoje, pazia hili linapasuka vipande viwili. Mahali Patakatifu sana pa hekalu la kidunia sio patakatifu tena.

Kote ni hofu na machafuko. Kuhani yuko karibu kuchinja kafara, lakini kisu kinaanguka kutoka kwa mkono wake usio na ujasiri na mwana-kondoo anatoroka. Mfano umekutana na halisi katika kifo cha Mwana wa Mungu. Kafara kubwa imefanywa. Njia ya kuingia patakatifu pa patakatifu imewekwa wazi. Binadamu aliye dhambini na kwenye huzuni hauhitaji tena ujio wa kuhani mkuu. Tangu sasa Mwokozi alipaswa kuhudumu kama kuhani na wakili katika mbingu za mbingu. Ilikuwa kana kwamba sauti iliyo hai imezungumza na waabudu: Sasa upo mwisho wa dhambi zote na sadaka kwa ajili ya dhambi. Mwana wa Mungu amekuja kulingana na neno Lake, “Tazama, nimekuja (katika gombo la chuo nimeandikiwa) Niyafanye mapenzi yako, Mungu.” Anaingia “Kwa damu yake mwenyewe aliingia mara moja tu katika Patakatifu, akiisha kupata ukombozi wa milele” (Waebrania 10:7; 9:12) (The Desire of Ages, 756, 757).